



REPUBLIKA E KOSOVËS

KUVENDI I KOMUNËS-VUSHTRRI

PROCESVERBAL
NGA MBLEDHJA E IV E RREGULLT E KUVENDIT TË KOMUNËS SË
VUSHTRRISË, MBAJTUR MË 26 MAJ 2022

Mbledhja është mbajtur në sallën e Kuvendit të Komunës së Vushtrrisë, duke filluar në orën 10:15. Në këtë mbledhje ishin të pranishëm anëtarët e Kuvendit të Komunës së Vushtrrisë:

Adnan Lahu, Agim Bregaj, Agron Përçuku, Alban Bajrami, Ali Januzi, Arlind Gogolli, Behar Duraku, Bekim Zabërgja, Blerina Shala, Bujar Pllana, Edona Gashi, Fakete Dushi, Fatmire Cecelia, Faton Hyseni, Galip Avdiu, Gentiana Rama, Ilmi Azemi, Kushtrim Hyseni, Leonora Gërguri, Lorik Maxhuni, Mek Selaci, Melihate Basholli-Latifi, Mensur Kasumi, Mensur Kastrati, Mentor Hasani, Nasuf Aliu, Nurie Halili, Nurten Çerkezi-Gjyshinca, Refik Maloku, Shkelzen Xhaferi, Spasoje Stefanoviq, Sylejman Mehulli, Ymer Haradinaj dhe Zojë Hajrizi.

Mungoi: Gresa Muli.

Mbledhjen e hapi dhe e kryesoi Melihate Basholli-Latifi, – kryesuese e kuvendit, e cila konstatoi se në sallë janë prezent 34 anëtarë të kuvendit, kuorum ky i mjaftueshëm për zhvillimin e punimeve të mbledhjes plenare dhe për marrje të vendimeve të plotfuqishme, andaj procedoi me rendin e ditës.

Të pranishëm në këtë mbledhje ishin edhe Kryetari i komunës, z. Ferit Idrizi, nënkryetari i komunës z. Shpëtim Zhegrova, përfaqësuesi i KFOR-it, përfaqësuesi i OSBE-së, përfaqësues të mediave të shkruara dhe elektronike, përfaqësues të shoqërisë civile.

Melihate Basholli-Latifi, kryesuese e kuvendit - lexoi para anëtarëve të kuvendit dispozitat e Rregullores të punës së kuvendit, lidhur me diskutimet, si dhe kërkoi që të respektohen këto dispozita ligjore ashtu që të jemi racional në kohë në mbledhjen e kuvendit.

Ilmi Azemi, anëtar i kuvendit - pasi i përshëndeti të pranishmit tha se ne si anëtarë të këtij kuvendi të zgjedhur me votën e lirë nga qytetarët e komunës sonë, jemi të thirrur të ndihmojmë aty ku kërkohet ndihma jonë dhe të kritikojmë aty ku mendojmë që nuk është në dobi të qytetarit tonë po edhe të japim propozime e të orientojmë procese të drejta e në të mirën e përgjithshme pa dallim në baza partiake apo kombëtare, sepse të gjithë janë qytetarë dhe taksapagues të qytetit tonë. Taksa e qytetarit është obligim njerëzor dhe ligjor dhe duhet të orientohet në përmirësimin e jetës së qytetarëve sepse ajo grumbullohet në buxhet me qëllimin e shpërndarjes së drejtë të qytetari dhe për krijimin e kushteve më të mira të jetesës së qytetarëve.

Me këtë fjalim timin besoj do të ndërrojnë qasje të gjithë skeptikët që po provojnë të krijojnë një atmosferë të rreme dhe të paqenë, duke provuar të vendosin rregulla të reja jodemokratike e me këtë edhe imponimin e heshtjes në vend të dhënies së impulsit të përfaqimit të ideve kreative të bazuara në ligje, transparent dhe llogaridhënie. Të nderuar anëtarë të kuvendit, unë besoj dhe mendoj se edhe shumica e juaj po edhe e qytetarisë aktive të Komunës së Vushtrrisë në seancën e kaluar na gëzoi lajmi nga drejtori i Drejtorisë për Gjeodezi, Kadastër dhe Pronë, mr. z. Albanex Tahiraj se është publiku Lista e pronave komunale në ueb – faqen zyrtare të komunës, kërkesë kjo e kahershme e deputetëve. Përkundër faktit se lista është e prezantuar vetëm me elemente bazike dhe nuk ofron informatat e duhura ka vlerën dhe peshën e jashtëzakonshme edhe formale edhe juridike andaj e përgëzoi Kryetarin dhe drejtorin për këtë hap shumë pozitiv dhe i inkurajoj që të ndërmarrin të gjitha veprimet për plotësimin me të dhëna të nevojshme për këto prona e kjo mund dhe duhet të bëhet për interesin e përgjithshëm. Por, prezantimi i Listës së pronave komunale ka shpërfaq përveç tjerash edhe dyshime për prona të caktuara, unë kam hulumtuar në gjeoportalin disa mostra të pronave, të cilat janë në regjistrin e pronave komunale edhe pse nuk kam hulumtuar të gjitha sepse duhet kohë, por nga ato që kam arrit të hulumtoj ka rezultuar dhe kam ardhur në përfundim jo të këndshëm për faktin se: • Parcela me nr.P-70202016-01815-0 Zona kadastrale Vushtrri në sipërfaqe të përgjithshme prej 2 ha e 57 ari e 28 m2 e që në listë mban nr.53 nuk ekziston dhe nuk del pronë komunale në gjeoportalin zyrtar të RKS. Gjithashtu edhe Parcela me nr.P-70202016-01827-0 Zona kadastrale Vushtrri në sipërfaqe të përgjithshme prej 93 ari e 40 m2 e që në listë mban nr.54 nuk ekziston dhe nuk del pronë komunale në gjeoportalin zyrtar të RKS.

Leonora Gërguri, anëtare e kuvendit - kërkoi nga Drejtoria e Inspektimeve që ndërmarrin masa ndaj tregtarëve të papërgjegjshëm të shpezëve afër tregut, të cilët po bëjnë prerjen e shpezëve dhe nuk po i largojnë mbeturinat dhe kjo po kundërmon me erë të rëndë dhe të padurueshme në tërë tregun, gjë për të cilën ka ankesa nga tregtarët dhe konsumatorët atje. Po ashtu kërkoi që të bëhet inspektimi i kushteve higjienike në të cilat po bëhet prerja e këtyre shpezëve, sepse kjo është duke rrezikuar në përhapjen e ndonjë epidemie. Mandej kërkoi nga Drejtoria e Shërbimeve Publike, që të rregullohet trotuari përgjatë rrugës Vushtrri-Nedakoc, në të cilën asfaltimi ka përfunduar vitin e kaluar, ndërsa trotuari ka mbetur në gjysmë dhe kësisoj po rrezikohen qytetarët që kalojnë në atë rrugë.

Sylejman Mehulli, anëtar i kuvendit - pasi përshëndeti të pranishmit, në emër të grupit kuvendar të LVV-së deklaroi se dekoratat apo titujt e nderit që do të ndahen për këtë vit kalendarik, nuk i kanë kaluar filtrat e domosdoshëm ligjor të paraparë me legjislacionin në fuqi, e kësisoj nuk kanë kaluar as në Komitetin për Politikë dhe Financa. Kjo nuk është një praktikë e mirë dhe është jotransparente. Pastaj ngriti çështjen e anulimit të konkurseve në Drejtorinë për Shëndetësi, përkatësisht në QKMF, gjë për të cilën nuk janë respektuar ligjet në fuqi. Mandej kemi parë një konkurs për drejtor të QKMF-së i cili është shpallur, më tej është anuluar disa herë, pastaj është rishpall prapë dhe i cili ka lënë shije të keqe të ndërhyrjes brutale politike në përzgjedhjen e menaxherit më të lartë të Qendrës Kryesore të Mjekësisë Familjare. Më herët kemi parë se është ndërruar ushtruesi i detyrës së QKMF-së me një zyrtar tjetër dhe më pas i njëjti ushtrues detyre tashmë është zyrtarizuar si drejtor i QKMF-së, pa asnjë kundërkandidat në procesin e intervistimit, si person i vetëm që bie në kundërshtim me normativat ligjore. Pastaj përsëriti se kishte kërkuar edhe në mbledhjen e KPF-së që të anulohen konkuret në fushën e shëndetësisë pasi që janë në kundërshtim me Udhëzimin Administrativ 07/2017 e që paraqesin shkelje juridike në procedurat e rekrutimit, konkretisht dispozitat ligjore të nenit 7 të udhëzimit, kërkojnë që anëtarët e komisionit intervistues duhet të kenë përgatitje superiore, por në realitet në njërin prej këtyre komisioneve anëtarët e tij kanë qenë me shkollë fillore ose të mesme dhe të cilët kanë vlerësuar në panel. Nuk

mund të flasim për një konkurs kur komisioni intervistues nuk ka përgatitje universitare, të vlerësojë me kompetencë në konkurse kaq të rëndësishme. Pastaj nuk mund të flasim për transparencë dhe barazi në rekrutim siç ka premtuar kryetari i komunës, përderisa e futni në komision vlerësues shefin e grupit kuvendar të partisë në pushtet. Kjo paraqet shkelje të rëndë të paanësisë në vlerësim dhe jo transparencë, kjo bie ndesh me atë që është premtuar apo ndoshta ajo që është premtuar në fushatë i takon vetëm fushatës sepse tani ka filluar një tjetër model i qeverisjes. Në këtë kontekst ceku se kryetarit të komunës i është dhënë mjaft kohë që të bëjë anulimin e këtyre konkurseve që përbëjnë shkelje ligjore. Për më tepër drejtori i QKMF-së është zëvendësuar fillimisht nga ish-pushteti me një ushtrues të detyrës, përkundër që performanca e ish-drejtoreshës ka qenë e pranuar nga të gjitha subjektet politike që janë ndërruar në pushtet gjatë kësaj periudhe kohore. Prandaj nuk është në rregull të ndërrohet dikush nga detyra siç ka qenë ish-drejtoresha e QKMF-së që ka treguar performancë të mirë dhe ka menaxhuar si duhet maksimalisht gjatë përballjes me pandeminë covid-19. Në këtë kontekst fjala është për drejtoreshën znj. Luljeta Zahiti, të cilës i janë bërë të gjitha kombinacionet për ta eliminuar nga pozita e drejtoreshës. Në anën tjetër drejtorin që është përzgjedhur, i njëjti ndaj tij janë zhvilluar procedura disiplinore në kuadër të QKMF-së, kjo edhe për faktin se pajisjet mjekësore në vlerë prej 100,000.00 € për disa vite nuk ishin hy në funksion dhe personi që tani është caktuar si drejtor ka përgjegjësi se përse ato pajisje nuk kishin hy në funksion.

Faton Hyseni, anëtar i kuvendit – ngriti shqetësimin e banorëve të fshatit Dumnicë e Llugës, konkretisht banorët përgjatë rrugës “Shefqet Isa” pyesin kryetarin e komunës se a është në projekt për këtë vit ndërtimi i kanalit të ujërave të zeza në gjatësi afërsisht 800 metra, edhe pse në tri mandatet e kaluara, ka qenë në projekt dhe se para dy viteve ishin sjellë gypat e kanalizimit, por dikush prej pushtetarëve të atëhershëm ka dhënë urdhër që ata gypa një të premtë të merren dhe të njëjtit janë vendosur në fshatin Pestovë. Shpresa e vetme e këtyre banorëve ka mbetur qeveria aktuale e komunës dhe banorët deklarojnë se heqin dorë nga kërkesat tjera infrastrukturore duke e prioritetizuar projektin e ujërave të zeza.

Behar Duraku, anëtar i kuvendit- pasi që i përshëndeti të pranishmit tha se duke parë gjendjen e rëndë të krijuar njëherë nga Covid 19 dhe tashme krizën me çmimet enorme të produkteve me bazike, siç janë buka e çdo produkt tjetër, propozoi që të subvencionohen me nga 300 euro nënat lehona, të cilat janë me asistencë sociale. Kriza financiare i ka prekur të gjithë, mirëpo kategoria e cila është me e ndjeshme mendoj që është kjo kategori dhe si të tillë propozoj që edhe të përkrahet dhe t’ju dilet në ndihmë. Propozimi, të jemi të çartë është vetëm për këtë vit si ndihmë në këtë kohë krizash.

Adnan Lahu, anëtar i kuvendit - tha se më të vërtetë konkurset e shpallura në shëndetësi përbëjnë një shqetësim për qytetarët dhe për anëtarët e kuvendit pasi ato karakterizohen me parregullsi. Ajo se çfarë kishte premtuar kryetari i komunës që 99 fije i ka të lidhura me qytetarët dhe 1 me subjektin e tij politik, në fakt nuk po del se është reale. Andaj kërkoi që këto konkurse të rishikohen dhe të njëjtat t’i shmangen parregullsive juridike.

Ymer Haradinaj, anëtar i kuvendit - pasi i përshëndeti të pranishmit, njoftoi se këto ditë shumica e shkollave dhe organizatat e tyre sindikale, kanë mbajtur takime me anëtarësinë e tyre, ku është diskutuar një ofertë e bërë nga kryetari i komunës për realizimin e të drejtave të mësimdhënësve që dalin nga kontrata kolektive. Në ato takime është thënë se kryetari i komunës është zotuar që të realizojë një pjesë të obligimeve që i ka komuna e që dalin nga kontrata kolektive. Konkretisht pyeti kryetarin se cilat janë ato obligime që ka premtuar kryetari i komunës se do t’i realizojë, sa është kostoja e tyre dhe cili është afati kohor në të cilin do t’i realizosh këto obligime komunale. Pastaj ngriti çështjen e një trotuari në fshatin Stanoc i Epërm rr. “Dalip Maloku”, i cili nga qeveria

e kaluar ka qenë e planifikuar të rregullohet në gjatësi prej 2 km, ndërsa janë përfunduar vetëm 1 km trotuar, dhe kësaj pjesë kryesore është mbetur pa u realizuar aty ku ka qarkullim të madh të qytetarëve, nxënësve dhe punëtorëve, konkretisht ky projekt – trotuar ka mbetur në gjysmë, pjesa më e madhe e lagjeve që gravitojnë në atë rrugë, siç janë lagjet: “Prronaj, Bllaca, Ajvazi, Maloku dhe Haradinaj”. Lidhur me këtë ai pyeti qeverinë se a ka planifikuar që ky trotuar i mbetur përgjysmë të realizohet. Po ashtu në qeverisjen e kaluar kishte filluar projekti për ndërtimin e kanalizimit në lagjen “Ajvazi” që lidhet me kanalizimin kryesor në fshatin Stanoc i Epërm, aty është bërë vendosja e disa gypave, por nuk është bërë shpuarja e asfaltit kryesor në rr.” Dalip Maloku” që lidh fshatin Stanoc me fshatin Breznicë dhe kemi bllokim të kanalizimit dhe nëse në këtë rast nuk intervenohet shpejt në atë projekt do të shkojë dëm gjithë ajo punë e kryer deri më tash. Lidhur me këtë ai kërkoi që në një afat sa më optimal të intervenohet në marrjen e masave për mënjanimin e këtij problemi, duke u lidhur ai gyp me kanalizimin kryesor.

Fatmire Cecelia, anëtare e kuvendit - ngriti shqetësimin e saj se edhe përkundër asaj që me aprovimin e Statutit të Teatrit të Qytetit, ku është bërë emërimi i këtij teatri me emrin e artistit Adem Mikullovcit, prapëseprapë në emërtimet dhe dokumentet zyrtare nuk po figuron emri zyrtar i teatrit, madje edhe shfaqjet kur mbahen apo konkurset brenda teatrit, asnjëherë nuk potencohet emri zyrtar Teatri i qytetit “Adem Mikullovcit”. E gjitha kjo po bëhet për qëllime politike, pasi që artisti Adem Mikullovcit në kohët e fundit të jetës së tij, ishte deputet i Lëvizjes Vetëvendosje, i zgjedhur nga qytetarët e Republikës së Kosovës, ndërsa një jetë të tërë ia ka kushtuar kulturës shqiptare. Më tej kërkoi që pikat e planit të punës të Drejtorisë së Kulturës të realizohen, pasi shumë prej tyre nuk janë zbatuar. Pastaj shtoi se Drejtoria e Inspektimeve me datë 5.4.2022, ka marrë një vendim për ndalimin e reklamimit të mallrave në hapësirat publike në trotuar. Vendimi ka hyrë në fuqi më datë 12.4.2022, por pavarësisht kësaj asnjë veprim nuk është ndërmarr në lidhje me zbatimin e këtij vendimi, në këtë rast bëhet fjalë për rrugët kryesore dhe sheshet.

Agron Përçuku, anëtar i kuvendit - kërkoi nga kryesuesja e kuvendit, që ta respektojë Rregulloren e punës së kuvendit, për sa i përket diskutimeve, kjo për faktin se po tejzgjaten diskutimet shërpe, jashtë pikave të rendit të ditës dhe jashtë interesit të përgjithshëm.

Refik Maloku, anëtar i kuvendit - duke ju referuar diskutimit të parafolësit të tij ceku se nuk ka gjë më të rëndësishme sesa uji i pijshëm për qytetarët dhe shtoi se kryetari aktual i komunës kishte premtuar që brenda afatit prej gjashtë muajsh do të bëjë zgjidhjen e problemit me ujë të pijshëm. Por edhe pas këtij afati nuk ka indikacione se do të ketë furnizim me ujë të pijshëm për vende ku janë bërë kycjet. Pastaj gjatë kohës kur ishte drejtor i Shërbimeve Publike për 14 muaj kishte realizuar rreth 4000 kycje në 23 fshatra, ndërsa 3000 prej tyre janë funksionale, 1000 prej tyre kanë probleme, në këtë kontekst shtoi se me disa shpenzime të vogla do të mund të vendosen pompat për të dërguar ujin e pijes nëpër ato fshatra ku procesi ka mbetur në gjysmë.

Ferit Idrizi, Kryetar i komunës - në adresimin e tij para anëtarëve të kuvendit sqaroi me sa vijon: buxheti i komunës të gjithë jemi dëshmitarë se është aprovuar me shumë vonesë dhe tani për më pak se një muaj është alokuar në komunë, dhe për këtë kemi vonesa në projektet siç është ai me ujësjellësin, që është duke u punuar në vendosjen e pompave, por edhe që problemi do të jetë me fshatrat që kanë lartësi gjeografike më të lartë në pjesën lindore të komunës, dhe për këtë ka filluar studimi i fizibilitetit për hartimin e një projekti detaj për procesin e shtrirjes së rrjetit të ujësjellësit, sepse nuk ka rrugë zgjidhje pa ndërtimin e një bazeni tek vendi kodrat e Skoçnës për furnizimin e asaj pjese me ujë të pijes. Lidhur me vendosjen e mbishkrimeve zyrtare në tetarin e qytetit, sqaroi se mirë kishte me qenë që vendosja e atyre mbishkrimeve të bëhet në qeverisjen e kaluar kur edhe është bërë emërimi i Teatrit të qytetit “Adem Mikullovcit” dhe premtoi se kjo çështje do të përmbillet shumë shpejt duke u vendosur zyrtarisht mbishkrimet dhe emrin zyrtar të këtij

institucioni komunal. Sa i përket lirimit të rrugëve dhe shesheve nga shitësit e mallrave, njoftoi se inspektorati komunal i ka paralajmëruar këta shitës dhe shpejt do të ndërmerren veprimet e nevojshme. Lidhur me të drejtat sindikale që burojnë nga kontrata kolektive për mësimdhënësit, sqaroi se oferta e tij si kryetar komune është që të ofrohen ujdë gjyqësore, në mes të komunës dhe mësimdhënësve, ku komuna do kursente shpenzime gjyqësore rreth 200,000.00 €, por përfitues do të dilnin edhe vetë mësimdhënësit nga kursimi i shpenzimeve për avokat. Andaj oferta e tij është që në saje të ujdësisë gjyqësore, të paguheshin shpenzimet e shujtës, transporti i mësimdhënësve dhe pagat jubilarë, ndërsa sa i përket licencave të mësimdhënësve këtë të drejtë mësimdhënësit do të mund ta realizonin përmes procedurave gjyqësore. Sa i përket propozimit të anëtarit të kuvendit z.Behar Duraku, ceku se është propozim i arsyeshëm, ndërsa projektet nga investimet kapitale të mbetura nga qeveria e kaluar do të vazhdojnë. Konkursi i shpallur nga komuna, nëse gjen se ka parregullsi të gjitha do të anulohet, kështu nuk do të lejohet të bëhen padrejtësi në përzgjedhjen e kandidatëve për punë në cilindo sektor. Kur bëhet fjalë për titujt e nderit të ndara si dekorata, sqaroi se këtë të drejtë e ka pasur Komiteti për Politikë dhe Financa, 1/3 e anëtarëve të kuvendit dhe Kryetari i komunës për të bërë propozime, andaj konform rregullores këtë të drejtë e ka shfrytëzuar ai si Kryetar komune dhe vlerësoi se ka bërë një përzgjedhje të duhur për t'i bërë nder të gjithë qytetarëve të Komunës së Vushtrrisë. Në fund lidhur me pretendimin se në listën e pronave figurojnë numra të parcelave që në fakt kemi të bëjmë me parcela inekzistente, kërkoi nga Drejtoria e Kadastrit që të bëjë spastrimin e kësaj liste.

Ymer Haradinaj, anëtar i kuvendit - pyeti kryetarin e komunës se me cilin zyrtar nga shoqata sindikale e arsimtarëve është takuar, që është keqkuptuar deklarata e kryetarit të komunës për ujdë gjyqësore nga kontrata kolektive.

Ferit Idrizi, Kryetar i komunës - sqaroi se e ka takuar kryesinë e SBASHK-ut, në Vushtri në ç' rast i ka bërë me dije qëndrimin e tij.

Sylejman Mehulli, anëtar i kuvendit - pyeti drejtorin e Drejtorisë së Prokurimit lidhur me aktivitetin e prokurimit, përkatësisht kontratën për furnizim me material higjienik AK-Vushtri, data e nënshkrimit 23.5.2022, vlera e përgjithshme e kontratës 79, 987.00 €, të njoftohet Kuvendi i komunës se kush është përfituesi i kësaj kontrate.

Hyda Dallku, drejtor i DP-së - sqaroi se ky aktivitet i prokurimit ka përfunduar me sukses, dhe përfitues i kësaj kontrate është operatori ekonomik "Korabi Show 2" me pronar Nazmi Azemi. Kjo kontratë është lidhur konform ligjeve në fuqi dhe nuk është evidentuar asnjë lloj shkeljeje.

Shpëtim Zhegrova, nënkryetar i komunës - duke ju referuar diskutimit dhe pyetjeve të anëtarit të kuvendit Sylejman Mehulli, ceku se shqetësimet që ai i shfaq në kuvend, nuk duhet të mbesin vetëm në kuvend, por ato duhet të adresohen tek organet e drejtësisë, dhe ai beson se asgjë nuk do del, por nuk i bënë nder askujt dhe parafolësit të tij të tentojë të ndërtojë narracione të rreme, gjoja për keqpërdorime. Më tej shtoi dhe vlerësoi që mos të detyrohet ai dhe qeveria e tij të paraqesin disa fakte dhe prova që e bëjnë të ndihet gogja keq, andaj kërkoi që seanca të rrjedhë sipas rendit të ditës dhe interesit të përgjithshëm.

Refik Maloku, anëtar i kuvendit - tha se nëse nënkryetari i komunës ka diçka që din për dikë që bie në kundërshtim me ligjin është mirë që ato t'i adresojë tek organet dhe t'i shpreh publikisht, por jo të tentojë të kërcënojnë dhe shantazhojnë.

Sylejman Mehulli, anëtar i kuvendit - vlerësoi se për disa seanca më radhë drejtorët e drejtorive komunale, me diskutimet e tyre, kanë goditur anëtarët e kuvendit, duke prekur edhe sferën personale të tyre, pa e përjashtuar edhe vetë atë. Por ai paralajmëroi se nuk ka çmim që e blen atë dhe personalitetin e tij, nuk ka gjë që e frikëson dhe e shantazhon, nëse keni ndonjë gjë për të dhe për subjektin e tij politik e që nuk do të keni asnjëherë, është mirë që t'i publikoni. Më tej shtoi se

ai vetëm posedon vota sa subjektet të caktuara politike dhe nuk ka forcë që e zbrapsë në përfaqësimin e interesit të përgjithshëm qytetar, për të cilin e ka marrë votën. Nëse dikush dëshironi të futet në gjëra personale, atëherë këtë mund ta bëjmë jashtë kuvendit.

Ferit Idrizi, Kryetar i komunës - duke ju referuar parafolësit të tij ceku se nuk ka arsye dhe as argumente, prandaj nuk nevojë për tensionim. Dhe shtoi se për të gjithë që është e ligjshme është edhe e pranueshme, dhe ligjshmëria duhet të shikohet sepse shefi i grupit kuvendar të PDK-së, si anëtar i komisionit nuk ka shkuar si përfaqësues i kuvendit, por si zyrtar i QKMF-së, dhe nëse ligji ia lejon të jetë anëtar i kuvendit dhe zyrtar në QKMF, atëherë ai rrjedhimisht ka të drejtë të jetë pjesë e komisioneve të caktuara. Në këtë kontekst ai kërkoi që t'i kthehemi rendit të ditës dhe procedimit të tij dhe të lëmë mënjatë polemikat dhe debatet shterpe.

Në fund të debatit jashtë rendit të ditës dhe për rendin e ditës, kuvendi pas votimit me vota “unanime” aprovoi këtë:

RENDITE

1. Shqyrtimi dhe aprovimi i procesverbalit nga mbledhja e jashtëzakonshme e Kuvendit të Komunës së Vushtrrisë, mbajtur më datë 14 prill 2022;
2. Shqyrtimi dhe aprovimi i procesverbalit nga mbledhja e rregullt Kuvendit të Komunës së Vushtrrisë, mbajtur më datë 28 prill 2022;
3. Shqyrtimi i Propozim- vendimit për ndarjen e dekoratave dhe mirënjohjeve;
4. Shqyrtimi i raportit tremujor për të hyrat dhe shpenzimet buxhetore;
5. Shqyrtimi i Propozim – vendimit paraprak për aprovimin e listës së veçantë që planifikohet për dhënie në shfrytëzim afatshkurtër të pronës së paluajtshme të komunës për vitin 2022;
6. Shqyrtimi i Informatës lidhur me gjendjen dhe mbrojtjen e pyjeve në Komunën e Vushtrrisë;
7. Shqyrtimi i Propozim – vendimit për formimin e komisionit për emërtimin dhe caktimin e kufijve të lagjeve urbane të Komunës së Vushtrrisë;
8. Shqyrtimi i Peticionit të përbashkët i banorëve të sheshit “Adem Jashari” dhe rrugës “Galip Badivuku” për largimin e trafos së rrymës nga sheshi.
9. Shqyrtimi i Peticionit të përbashkët të fshatrave Nedakoc dhe Pestovë për kundërshtimin e ndërtimit të një objekti që konsiderohet se cenon moralin publik;
10. Të ndryshme.

1. Shqyrtimi dhe aprovimi i procesverbalit nga mbledhja e jashtëzakonshme e Kuvendit të Komunës së Vushtrrisë, mbajtur më datë 14 prill 2022

Pas shqyrtimit të kësaj pike të rendit të ditës, Kuvendi me vota “unanime” aprovoi procesverbalin nga mbledhja jashtëzakonshme e Kuvendit të Komunës së Vushtrrisë, mbajtur më datë 14 prill 2022.

2. Shqyrtimi dhe aprovimi i procesverbalit nga mbledhja e rregullt Kuvendit të Komunës së Vushtrrisë, mbajtur më datë 28 prill 2022

Pas shqyrtimit të kësaj pike të rendit të ditës, Kuvendi me vota “unanime” aprovoi procesverbalin nga mbledhja rregullt e Kuvendit të Komunës së Vushtrrisë, mbajtur më datë 28 prill 2022.

3. Shqyrtimi i Propozim- vendimit për ndarjen e dekoratave dhe mirënjohjeve

Ferit Idrizi, Kryetar i komunës - paraqiti sqarime lidhur me dekoratat-titujt e ndrit që janë planifikuar të ndahen për nder të 17 qershorit “Ditës së Çlirimit të Vushtrrisë”, ku ceku se me kujdes është bërë përzgjedhja e personaliteteve që do të ndahen këto çmime apo titujt dhe beson se titujt e tillë do t’i bëjnë nder qeverisë komunale, kuvendit dhe gjithë qytetarëve. Në vazhdim ai paraqiti një ekspozitë dhe arsyetim të zgjeruar të propozimeve për dekorata dhe njoftoi se propozimet për këto dekorata janë bërë konform rregullores, andaj kërkoi që këtë propozim të aprovohej në mënyrë unanime.

Adnan Lahu, anëtar i kuvendit - tha se Vushtrria vërtet ka fat që ka shumë personalitete me vlera të larta që meritojnë të dekorohen. Pastaj vlerësoi se si kuvend kemi bërë një praktikë të mirë për nderimin e ish-kryetarëve të komunës dhe shtoi se mirë kishte me qenë që votimi të bëhet në formë të ndarë për dekorata dhe mirënjohje.

Sylejman Mehulli, anëtar i kuvendit - tha se për propozimin për ndarjen e dekoratave dhe titujve, duhet të kemi një trajtim të posaçëm për secilin propozim për titull ashtu siç edhe përcaktohet me rregullore. Sa i përket mirënjohjeve që janë gjithsej 8, mund të jepen propozime tjera nga anëtarët e kuvendit dhe kështu të shkohet me votim të fshehtë. Sa i përket titullit <Nderi i qytetit> njoftoi se grupi kuvendar i LVV-së propozon atdhetarin e çështjes kombëtare, kryetarin e parë të komunës pas luftës z.Xhemaj Pllanën, për këtë titull, ai arsyetoi se nuk duhet të priset praktika e mirë që të nderohen me këtë titull ish-kryetarët e Komunës së Vushtrrisë, dhe shtoi se familja e z.Pllana është familje emblematike andaj meriton të nderohet.

Ferit Idrizi, Kryetar i komunës - tha se propozimet për titujt e ndrit janë bërë dhe atë sipas afatit të përcaktuar në rregullore, në këtë kontekst është konsumuar e drejta për propozime. Ai vlerësoi se pajtohet me propozimin e grupit të LVV-së, porse në këtë rast është e pamundur të bëhen propozime tjera.

Sylejman Mehulli, anëtar i kuvendit - tha se propozimet për titujt e ndrit janë proceduar me vonesë jo sipas afatit ligjor, dhe ceku se nga praktika e kaluar në kuvend, ka pasur raste pikërisht nga PDK-ja që gjatë seancës ka propozuar emra për titullin <Nderi i qytetit>. Në këtë kontekst ceku se është mirë mos të priset radha për nderimin e ish-kryetarëve të Komunës së Vushtrrisë, duke filluar nga ish-kryetari i parë i komunës z.Xhemaj Pllana.

Në vazhdim kuvendi pas votimit me 25 vota “për”, 8 vota “kundër” dhe 1 votë “abstenim” vendosi që votimi i titujve të nderit të bëhet me votim të përgjithshëm në pako.

Me 24 vota “për”, 3 vota “abstenim” kuvendi vendosi me sa vijon:

1. Me këtë vendim, në rastin e shënimit të “Ditës së Çlirimit të Vushtrrisë”, me titullin “**Qytetar nderi**” i Vushtrrisë nderohen:

1.1.z.Arif Vladi-artist/këngëtar i njohur shqiptar;

1.2.znj.Liri Rasha-artiste/këngëtare shqiptare.

2. Dorëzimi i këtyre dekoratave-titujve do të bëhet nga Kryetari i komunës, më datë 17 qershor - “Ditën e Çlirimit të Vushtrrisë”.

3. Për zbatimin e këtij vendimi obligohen: Kryetari i komunës, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hynë në fuqi shtatë (7) pas publikimit në faqen zyrtare të Komunës së Vushtrrisë.

1. Në rastin e shënimit të manifestimit “Ditët e Hasan Prishtinës”, çmimi “**Hasan Prishtina**” iu ndahet:

1.1 z. **Ali Januzi**, veteran i luftës së UÇK-së;

1.2 z. **Idriz Asllani**, veteran i luftës së UÇK-së;

1.3 z. **Ramadan Manovi**, veteran i luftës së UÇK-së.

2. Dekoratat nga pika një e këtij vendimi i dorëzon Kryetari i komunës në ditën e shënimit të kësaj date, më 10 qershor 2022.

3. Për zbatimin e këtij vendimi obligohen: Zyra e Kryetarit dhe Drejtoria për Kulturë, Rini dhe Sport dhe Drejtoria për Buxhet dhe Financa.

4. Ky vendim hynë në fuqi shtatë (7) pas publikimit në faqen zyrtare të Komunës së Vushtrrisë.

1. Në rastin e shënimit të “Ditës së Çlirimit të Vushtrrisë”, z. **Bekim Shyti** nga Vushtria, ish-komandant i Njësisë Speciale të Zonës Operative të Shalës, i ndahet çmimi “**Emblema e Vushtrrisë**”.

2. Dekoratën nga pika një (1) e këtij vendimi e dorëzon Kryetari i komunës në ditën e shënimit të kësaj date, më 17 qershor 2022.

3. Për zbatimin e këtij vendimi obligohen: Zyra e Kryetarit dhe Drejtoria për Kulturë, Rini dhe Sport.

4. Ky vendim hynë në fuqi shtatë (7) pas publikimit në faqen zyrtare të Komunës së Vushtrrisë.

1. Me këtë vendim, z. **Muharrem Shabani** nga Komuna e Vushtrrisë i ndahet titulli “**Nderi i qytetit**”, për kontributin e tij dhënë për Vushtrrinë, si intelektual dhe si ish-kryetar i Komunës së Vushtrrisë.

2. Dorëzimi i këtij titulli do të bëhet nga Kryetari i Komunës më datë 17 qershor- “Ditën e Çlirimit të Vushtrrisë”.

3. Për zbatimin e këtij vendimi obligohen: Kryetari i komunës, Drejtoria për Kulturë, Rini dhe Sport, dhe Drejtoria për Buxhet dhe Financa.

4. Ky vendim hynë në fuqi shtatë (7) pas publikimit në faqen zyrtare të Komunës së Vushtrrisë.

Ali Januzi, anëtar i kuvendit-propozoi për mirënjohje Gjevat Deliu, Shefqet Galicën dhe Sokol Braha.

Sylejman Meholli, anëtar i kuvendit - propozoi për mirënjohje Bedri Shalën i cili është mësues veteran arsimit, ka qenë komandant dhe njëri nga themeluesit e UÇK-së, si dhe Ahmet Morina, pjesëtar i orëve të para në Ushtrinë Çlirimtare të Kosovës.

Agim Bregaj, anëtar i kuvendit - propozoi Ramadan Shaqirin që të nderohet me mirënjohje.

Faton Hyseni, anëtar i kuvendit -propozoi Blerim Zhabarin që të nderohet me mirënjohje për jetën dhe veprën.

Refik Maloku, anëtar i kuvendit - propozoi Rasim Bajramin post-mortum që të nderohet me mirënjohje.

Agron Përçuku, anëtar i kuvendit - propozoi Nazif Merovcin një hendbollist i dalluar që të nderohet me mirënjohje.

Fatmire Cecelia, anëtare e kuvendit - propozoi Miran Hlilin që të nderohet me mirënjohje për jetën dhe veprën e tij.

Ilmi Azemi, anëtar i kuvendit - propozon Driton Zabërgjen që të nderohet me mirënjohje.

Kuvendi me vota “unanime” aprovoi formimin e komisionit për mbarëvajtjen e procesit të votimit për ndarjen e mirënjohjeve në përbërjen si në vijim:

Nurie Halili PDK;
Edona Gashi LDK dhe
Mek Selaci LVV.

Pas zhvillimit të dy rundeve të procesit të votimit të fshehtë për ndarjen e mirënjohjeve kuvendit vendosi me sa vijon:

1. Me këtë vendim, Kuvendi i komunës për nder të “Ditës së Çlirimit të Vushtrisë”, më 17 qershor ndan këto mirënjohje:

1.1 Blerim Zhabari - (post mortum), për kontributin e dhënë për çështjen kombëtare, ish pjesëtar i UÇK-së dhe ish-punëtor i dalluar i administratës komunale në fushën e informimit publik;

1.2 Miran Halili – (post mortum), për kontributin e dhënë për çështjen kombëtare, ish- drejtor i administratës komunale;

1.3 Habib Mustafa - për kontributin e dhënë si veteran i luftës së UÇK-së, veteran i arsimit, profesor i historisë;

1.4 Elvira Mazhiqi - artiste në solo-këndim;

1.5 Ali Jakupi - (post mortum), ish-ministër, profesor universitar;

1.6 Ramadan Shaqiri- (post mortum), për kontribut për çështje kombëtare i martirizuar për lirinë e Kosovës;

1.7 Bedri Shala- veteran i arsimit, ish-komandant i UÇK-së, luftëtar i orëve të para në lutën e fundit;

1.8 Nazif Merovci - veteran i sportit, hendbollist i dalluar i viteve të 90-ta, i cili dha kontribut të çmuar për sportin vushtrrias;

1.9 Shefqet Galica- (post mortum), veteran i arsimit, kontribues i çështjes kombëtare, pjesëmarrës në demonstratat e vitit 1981;

1.10. Sokol Braha- (post mortum), veteran i arsimit, kontribues i çështjes kombëtare, pjesëmarrës në demonstratat e vitit 1981;

2. Për zbatimin e këtij vendimi obligohen: Zyra e Kryetarit të komunës, Drejtoria për Kulturë, Rini dhe Sport dhe drejtoritë tjera kompetente komunale.

3. Ky vendim hynë në fuqi shtatë (7) pas publikimit në faqen zyrtare të Komunës së Vushtrrisë.

4. Shqyrtimi i raportit tremujor për të hyrat dhe shpenzimet buxhetore;

Remzi Ahmeti, drejtor i DBF-së - paraqiti sqarime hyrëse lidhur me qarkoren buxhetore për vitet 2021-2022 dhe 2023.

Pas shqyrtim të kësaj pike të rendit të ditës, kuvendi me vota “unanime” aprovoi raportin tremujor për të hyrat dhe shpenzimet buxhetore.

5. Shqyrtimi i Propozim – vendimit paraprak për aprovimin e listës së veçantë që planifikohet për dhënien në shfrytëzim afatshkurtër të pronës së paluajtshme të komunës për vitin 2022

Adnan Lahu, anëtar i kuvendit - tha se kishte me qenë mirë që për t'i sqaruar gjërat për anëtarët e kuvendit, këtyre pronave t'i bashkëngjitet edhe një ortofoto, me qëllim që të dimë se ku gjenden këto prona. Tutje shtoi se edhe pse e ka përgëzuar drejtorin e kadastrit, për publikimin e listës së pronave, ai vlerësoi se publikimi i asaj liste të pronave ka qenë i ngutshëm, duke pasur parasysh faktin se në ato lista ka shumë gabime dhe ekzekutivi, por edhe kuvendi duhet të jenë të kujdesshëm që mos të krijojnë më shumë dëm sesa dobi prej punëve dhe veprimeve tona. Duhet pasur për bazë pronat që janë në komasacion, pronat që janë ndryshuar dhe nuk janë në pronësi të komunës, dhe kësaj duhet të bëhet një verifikim më i detajuar para se të bëhet publikimi. Aprovimit të këtij propozim-vendimi është dashur t'i paraprijë shpallja e një liste të veçantë të pronave në faqen zyrtare të komunës dhe prej asaj liste të vinë propozimet këtu në kuvend. Ai tha se nuk e ka gjetur listën e pronave në faqen zyrtare të komunës, ndoshta është shpallur në ndonjë vend special. Andaj nëse një listë e tillë nuk është publikuar në faqe zyrtare për pronat që planifikohen të jepen në shfrytëzim për vitin 2022, atëherë procedimi i këtij propozim-vendimi nuk është bërë në formë të rregullt.

Faton Hyseni, anëtar i kuvendit - duke ju referuar pikës 1.13 të propozim-vendimit, konkretisht parcelës që gjendet objekti i vjetër i shkollës fillore “Migjeni” në Stanoc të Epërm i cili menaxhohet nga Komuna e Vushtrrisë, objekt i cili është dhënë në shfrytëzim nga komuna, vlerësoi se në këtë rast është bërë një gabim i madh, shkelje ligji, konkretisht është shkelur neni 1.6 i Ligjit për Dhënien e Pronës në Shfrytëzim i cili thotë: Parimi i ruajtjes së karakteristikave dhe vlerave unike të pronës - nënkupton se, shfrytëzuesi i pronës komunale, duhet ta shfrytëzojë

pronën vetëm sipas destinimit të pronës, duke ruajtur vlerat e saj kulturore, historike, arkeologjike, arkitekturën historike dhe çdo vlerë tjetër unike të saj, ashtu siç është përcaktuar me legjislacionin në fuqi, andaj shtroi pyetjen se a e kanë respektuar këtë parim ata që e kanë votuar këtë vendim për dhënien e atij objekti në shfrytëzim. Ai dyshon se dhënia e asaj prone në shfrytëzim është karakterizuar me pazare dhe ryshfet nga qeverisja e kaluar, sepse ka pasur biznese aty afër që kishin mundur të merreshin në shfrytëzim. Kundërshtimin më të drejtë dhe më së mirë të këtij procesi e kishte bërë Ymer Haradinaj asamblist i LVV-së. Më tej shtoi se prona e komunës në fshatin Stanoc i Epërm është shpërdoruar nga gjithsecili dhe tani kemi mbetur pa pronë, e kjo ka bërë që mos të kemi pronë për vendosjen e objekteve me rëndësi vitale si çerdhe, shkollë apo shtëpi të shëndetit, andaj kjo është e papranueshme. Lidhur me këtë pronë ai propozon që këtij subjekti ekonomik t'i vazhdohet afati i shfrytëzimit edhe për një vit, më tej t'i gjendet një tjetër lokalitet për zhvillimin e veprimtarisë së biznesit.

Ilmi Azemi, anëtar i kuvendit - njoftoi se me kujdes kishte kërkuar nga drejtori i Drejtorisë së Kadastrit që kjo pikë e rendit të ditës të shtyhet për një mbledhje tjetër, ashtu që të spastrohet kjo listë nga disa defekte. Për më tepër shtoi se pronat që planifikohen të jepen në shfrytëzim duhet të jenë të lira, ato nuk gutojnë të jenë të uzurpuara, nuk duhet të ketë ndërtime tjera, duhet të ketë definim të qartë të pronësisë mbi ato prona, në rastin tonë ky propozim-vendim karakterizohet me shumë defekte, ku në listë figurojnë prona që me kulturë janë rrugë, varreza e të ngjashme. Nëse vazhdohet kështu me këtë qasje, do të rrezikohet komuna, sepse ata që i marrin këto prona në shfrytëzim do mund ta padisin komunën për mosmundësi të shfrytëzimit të lirë të pronave dhe të pasojnë shumë procese gjyqësore, ku komuna do të humbë siç edhe ka ndodhur së fundi në rastin e Bedri Shabanit ku komuna ka humbur qindra mijëra euro, dhe shumë zyrtarë komunal bartin përgjegjësi në këtë proces. Pastaj në këtë listë të propozuar figuron një parcelë me numër 51 në fshatin Kollë ku në sipërfaqe prej 1 hektar janë varreza, mandej kemi rrugë siç është rasti me rrugën "Ilaz Kolla". Mandej në fshatin Bukosh kemi dy raste, pika 1.10 e propozim-vendimit, në këto prona kemi ndërtime, ku aty jetojnë familje, madje aty është rruga "Legjendarët e UÇK-së" që figuron në po këtë listë. Andaj kërkoi që kjo pikë të shtyhet për mbledhjen tjetër dhe lista të procedohet e spastruar vetëm me prona reale që mund të jepen në shfrytëzim.

Adnan Lahu, anëtar i kuvendit - propozoi që kjo pikë të shtyhet për një mbledhje tjetër, më përjashtim të pikës 1.13 të këtij propozimi, ku bëhet fjalë për ish-objektin e shkollës në fshatin Stanoc i Epërm, dhe inkurajoi kryetarin e komunës që të vazhdohet me dhënien edhe të objekteve tjera të lira për veprimtari biznese. Më tej njoftoi se për këtë pronë që u apostrofua nuk ka pasur votim në kuvend, pasi që bëhet fjalë për dhënie në shfrytëzim afatshkurtër deri në një vit dhe këtë të drejtë e ka kryetari i komunës për të lidhur kontratë.

Faton Hyseni, anëtar i kuvendit - tha se ka pasur shkelje ligjore në rastin e dhënies në shfrytëzim të pronës-objektit të shkollës në fshatin Stanoc i Epërm, sepse nuk është përmbushur kriteri buxhetor prej 10% i participimit siç parashihet me ligj.

Adnan Lahu, anëtar i kuvendit - sqaroi se nuk ka shkelje ligjore, në rastin që po pretendohet, kjo për faktin se nuk ka pasur negociim direkt nga ana e kryetarit të komunës atë kohë, por ai objekt është dhënë në shfrytëzim për më pak se një vit, me kërkesën e palës, adresuar drejtorisë kompetente dhe me kontratë të lidhur nga kryetari i komunës.

Sylejman Mehulli, anëtar i kuvendit - tha se meqë ka paqartësi të mëdha sa i përket kësaj pike të rendit të ditës, edhe ai është i mendimit që kjo pikë të shtyhet për njërin nga seancat e radhës, pasi të qartësohet shumë aspekti i kësaj çështjeje. Për më tepër kuvendi ka ngritur një komision për verifikimin e pronave, dhe është mirë që ky komision të bëjë verifikimin e këtyre pronave dhe kësajsoj kuvendi do ta ketë më lehtë të japë këto prona në shfrytëzim.

Bekim Zabergja, anëtar i kuvendit - tha se sot ka pritur që në agjendë të kuvendit të jetë propozimi për shfuqizimin e vendimit me numër 81/21 për dhënien e pronës komunale në shfrytëzim në Zonën Ekonomike në Lumadh, andaj kërkoi sqarim nga kryesuesja e kuvendit se përse kjo pikë nuk është futur në rend të ditës. Po ashtu kërkoi që të zbatohet dhe respektohet Rregullorja e punës së kuvendit që ka të bëjë me diskutime pasi që anëtar i kuvendit nuk mund të diskutojë dy herë për të njëjtën pikë të rendit të ditës. Sa i përket propozim-vendimit për aprovimin e listës së pronave për dhënien në shfrytëzim Nisma-Socialdemokrate e mbështet në plotëni pa kurrfarë rezerve. Kjo për arsye se këto prona nuk po jepen menjëherë në shfrytëzim, por vetëm lista prioritare, e më tej komisioni enkas për këtë çështje do ti përgatitë procedurat tjera për pronat dhe do t'ia propozojë kuvendit për aprovim. Lidhur me pikën 1.13 të propozimit që flitet për objektin në fshatin Stanoc i Epërm në sipërfaqe prej 845 m², dhe për këtë pronë kryetari i komunës i është drejtuar me shkresë AKP-së dhe MAPL-së për interpretim ligjor dhe në bazë të përgjigjes konstatohet se objekti në fjalë është në pronësi të komunës, ndërsa parcela është pronë e AKP-së, duke marrë për bazë këto fakte i propozoi kryetarit të komunës që të zhvillon negociata me AKP-në për këmbimin e kësaj prone, ndërsa investitori të vazhdojë veprimtarinë e tij deri në gjetjen e një zgjidhjeje përfundimtare.

Ymer Haradinaj, anëtar i kuvendit - lidhur me objektin e shkollës në fshatin Stanoc i Epërm, i cili i është dhënë në shfrytëzim një operatori ekonomik, është bërë pa marrëveshje me banorët lokal, pa marrëveshje me Këshillin e fshatit dhe pa dëgjim publik, duke mos respektuar peticionin të cilin e kanë nënshkruar 510 banorë të fshatit Stanoc i Epërm, duke mashtruar opinionin publik me pretendimin se do të ngritet një fabrikë ku do të punësoheshin 60 deri 100 punëtorë. Me shumë bujë e pompozitet është thënë se dikush po del kundër punësimit, jo as atëherë as tash dhe asnjëherë nuk janë kundër punësimit, dhe shtoi se kjo pikë e rendit të ditës nuk është dashur fare të vijë këtu, sepse është kompetencë ekskluzive e kryetarit të komunës, prandaj ky i fundit është dashur të vendos shumë më herët, sepse kontrata kompanisë <Vitex> i ka skaduar në mars të këtij viti. Kjo kompani në objektin e shkollës është duke punuar në mënyrë ilegale, është thënë se do të punësohen 60 deri 100 punëtorë, andaj për këtë kërkoi nga personat përgjegjës të sillen kontratat dhe emrat e punëtorëve. Lidhur me këtë ai ka informata se në këtë fabrikë janë të punësuar 5 gra dhe për dy muaj rresht nuk kanë marrë pagë dhe trajtohen në mënyrën më të keqe të mundshme. Në fund kërkoi nga kryetari i komunës, që të dalë në terren, të konsultohet me banorët lokal, me këshillin e fshatit, të zhvillojë negociata dhe në fund të merret një vendim i drejtë i arsyeshëm dhe në interes të përgjithshëm.

Mensur Kasumi, anëtar i kuvendit - tha se e ndan mendimin me kolegët e tij parafolës, që ai objekt nuk i plotëson kushtet të jetë fabrikë, dhe shtoi se ka pasur premtime që ai objekt të shndërrohet në çerdhe publike për banorët e fshatit Stsanoc i Epërm, si fshati më i madh i Komunës së Vushtrrisë, andaj kërkoi që operatorit ekonomik t'i shkëputet kontrata dhe ai objekt të shndërrohet në çerdhe sipas kërkesës së banorëve të fshatit Stanoc i Epërm.

Ferit Idrizi, Kryetar i komunës - vlerësoi se në saxe të diskutimeve të anëtarëve të kuvendit shihet se është kërkesë që kjo pikë të shtyhet për ndonjë mbledhje të ardhshme, me qëllim të mënjanimi të defekteve që u evidentuan. Pikë referente është edhe objekti i shkollës në fshatin Stanoc i Epërm, për të cilin informoi se nëse ka bazë ligjore, kishte premtuar se do të ndërpritet kontrata. Më tej shtoi se nuk do të hynë në negociata për këtë kontratë pasi që kjo e drejtë e kryetarit të komunës është konsumuar dhe kontrata operatorit ekonomik i ka skaduar më datë 28.2.2022. Lidhur me këtë çështje i janë adresuar me shkresa AKP-së dhe MAPL-së për opinion, të cilët kanë vlerësuar se komuna ka të drejtë të japë në shfrytëzim objektin e shkollës pasi që është pronë e komunës. Për ta konstatuar gjendjen faktike është ngritur një komision, i cili ka ofruar raport me shkrim ku

gjen se në atë objekt janë bërë investime dhe punësime. Lidhur me këtë problematikë propozoi që të ngritet një komision miks mes kuvendit dhe qeverisë që do të bënte evidentimin e gjendjes atje për gjitha çështjet si për investimet, punësimet dhe kontratat, dhe më pas të sillte kjo çështje në kuvend. Ai potencoi se nuk e ka ndërmend të lidhë kontratë njëvjeçare me atë operator ekonomik, por nëse kuvendi vlerëson pozitive dhënien e pronës afatshkurtër do të jetë e mirëseardhur, por nëse vlerësohet e rrugës shkëputja e kontratës, ai do të ishte dakord. I njëjti komision të trajtojë edhe çështjen e një objekti dhe peticionin nga banorët e fshatit Pestovë-Nedakoc.

Albanez Tahiraj, drejtor i DGJKP-së - në adresimin e tij para kuvendit sqaroi se, Ligji për Dhënien e Pronës Komunale në Shfrytëzim, obligon komunën të bëjë publikimin e dy listave të pronave në faqen zyrtare të komunës - listën e përgjithshme dhe listën e veçantë. Tutje shtoi se qeveria e kryetarit Idrizi, prioritet e ka respektimin e ligjit dhe rendit, nuk ka plane tjera, dhe ajo është duke i përmbushur obligimet që dalin nga ligji. Për ta kristalizuar edhe më tepër këtë ai sqaroi se ajo nuk është e ndikuar nga palët e treta për faktin se ato nuk presin tek dera e qeverisë dhe Drejtorisë së Pronës, se cila pronë po kalon e cila jo, duke shtuar se ne nuk kemi obligime të tilla, kemi obligime ligjore e qytetare ashtu edhe siç është vepruar për këta gjashtë muaj qeverisjeje. Pastaj lexoi para kuvendit dispozitat e ligjit që rregullojnë fushën e dhënies së pronës në shfrytëzim që kanë referencë publikimin e listës së pronave. Duke polemizuar me anëtarin e kuvendit Adnan Lahu, shtoi se ai për një mandat të plotë nuk kishte arritur të publikonte listën në fjalë, ndërsa tani lista është publikuar nga ana e tij për më pak se gjashtë muaj kohë, andaj ky sukses i tij e ka shtangur ish-drejtorin. Në fund sqaroi se obligimi ligjor i publikimit të kësaj liste të pronave rrjedh deri më datën 31 mars të vitit kalendarik, porse në rastin konkret ky afat është vazhduar për shkak se viti 2021 ka qenë vit elektorale, por e njëjta me shkresë zyrtare është mundësuar që të zgjatet afati ligjor nga MAPL-ja.

Adnan Lahu, anëtar i kuvendit - kërkoi nga Drejtori i Kadastrit që të flasë pa emocione dhe të mësohet të pranojë kritikën atëherë kur gabon. Tutje lexoi nenin 13 të Ligjit për Dhënien e Pronës në Shfrytëzim, i cili thotë: Publikimi i listës së pronave të paluajtshme të komunës 1. Komuna duhet të publikojë listën e përgjithshme të pronave të paluajtshme të komunës, si dhe listën e veçantë të pronave që planifikohen për dhënien në shfrytëzim për vitin vijues deri me 31 dhjetor, duke arsyetuar interesin publik dhe zhvillimin ekonomik të komunës. 2. Lista e pronave të paluajtshme për dhënien në shfrytëzim duhet të përmbajë këto të dhëna: të dhënat kadastrale të pronës, qëllimin, destinimin, datën e publikimit të njoftimit dhe periudhën kohore për dhënien në shfrytëzim të pronës së paluajtshme të komunës. Më tej ai insistoi se ajo listë nuk është sjell në kuvend, lista e pronave komunale që duhet të jepet në shfrytëzim brenda vitit kalendarik.

Ilmi Azemi, anëtar i kuvendit - tha se e përgëzon drejtorin e kadastrit për punën e shkëlqyer që ka bërë deri tani, por ai kishte kërkuar miqësisht që kjo pikë të shtyhet për mbledhjen tjetër, derisa të mënjanohej disa defekte, përndryshe procedura që është ndjekur për publikimin e listës është perfekt.

Shpëtim Zhegrova, nënkryetar i komunës - tha se pjesët e propozimit për dhënien e pronës në shfrytëzim ku janë identifikuar të meta mund të hiqen nga vendimi, ndërsa pjesa tjetër mund të procedohet dhe aprovohet sot. Ndërsa pjesë të pronave ku mund të ketë uzurpime mund të obligohen palët të shikojnë sa a ka pengesa para se të marrin në shfrytëzim atë pronë.

Albanez Tahiraj, drejtor i DGJKP-së - sqaroi se në këtë propozim-vendim janë gjithsej 18 parcela që do të jepen në shfrytëzim, ndërsa lista përsëriti se është obligim ligjor që të publikohet, por në këtë rast nuk po jepen në shfrytëzim këto prona, por vetëm po publikohen, ndërsa për më shumë më këto procedura do të merren komisionet gjegjëse, që do të kenë për detyrë shpalljen e ankandëve, inspektim të pronave se a janë të lira për t'u dhënë në shfrytëzim. Në të kundërtën

deklaron me sinqeritet se asnjëlloj detyrimi nuk kanë ndaj dikujt, por vetëm përmbushjen e kërkesave të ligjit.

Sylejman Mehulli, anëtar i kuvendit-vlerësoi se sa i përket dhënies në shfrytëzim të objektit-shkollë në Stanoc të Epërm, kryetari aktual i komunës nuk ka asnjë lloj përgjegjësie juridike, sepse është dhënë më herët kjo pronë në shfrytëzim. Por tani e tutje se si do të veprohet përgjegjësia do të bie edhe mbi kryetarin aktual. Ai i sugjeroi kryetarit të komunës të marrë një vendim lidhur me këtë çështje, pasi që kontrata ka skaduar dhe se ai objekt është duke u shfrytëzuar ilegalisht. Vendimi që duhet të merret duhet të jetë racional, dhe në konsultim me banorët lokal, këshillin e fshatit, me këshillin e arsimitarëve që punojnë aty në atë shkollë, këshillin e prindërve dhe akterët tjerë relevant. Është mirë të analizohet kjo çështje në aspektin shumëdimensional, se e ka ndonjë konsekuencë që dëmton procesin mësimor nga aspekti i sigurisë së nxënësve, ai mjedisor e të ngjashme, dhe nëse është e nevojshme le të formohet edhe komisioni kuvendar i propozuar më herët, ashtu që mos të sfidohet kuvendi e as kryetari i komunës, por të merret një vendim racional e i pranueshëm.

Shpëtim Zhegrova, nënkryetar i komunës - tha se çështja e ngritjes së asaj fabrike në objektin e shkollës "Migjeni" në Stanoc të Epërm, është përcjellë me shumë kundërshti me peticion pro dhe kundër, por e vërteta është se në atë kohë është aprovuar një rekomandim, ku komuna ka marrë obligime për ndërtimin e një çerdheje, një bibliotekë dhe fushë sportive, andaj tani komuna kur të planifikojë buxhetin për vitin 2023 mund të futë këto projekte për realizim. Pastaj shtoi se është mirë të ngritet komisioni për verifikimin e gjendjes në atë objekt dhe ceku se në bazë të raportit të mëhershëm atje figurojnë se janë të punësuar rreth 20 perona dhe janë investuar afër 150,000.00 € nga operatori ekonomik, ndaj tani është mëkat t'i hedhet poshtë kontributi atij investitori. Në fund tha se ato njësi kadastrale që nuk janë të lira të hiqen nga propozim-vendimi dhe të aprovohet si i tillë, ashtu që mos të bllokohet procesi i dhënies në shfrytëzim i pronës komunale.

Faton Hyseni, anëtar i kuvendit - tha se projekti i fabrikës në shkollën fillore "Migjeni" në Stanoc të Epërm, do të kundërshtohet fuqishëm nga banorët lokal, dhe nëse dëshirohet të mos mbyllen vendet e punës, atëherë ai investitor të vendoset në objektin e vjetër të shkollës në fshatin Pestovë. Mandej shtoi se nënkryetari i komunës është duke bërë një gabim të madh dhe po bën thirrje për shkelje ligjore, sepse ndërrimi i destinimit të pronës bie në kundërshtim me parimet ligjore.

Albanez Tahiraj, drejtor i DGJKP-së - sqaroi se pjesë e komisionit për verifikimin e gjendjes në objektin-shkollë në fshatin Stanoc i Epërm, ka qenë dhe kanë konstatuar se në atë fabrikë janë investuar rreth 170,000.00 € dhe janë të punësuar 16 persona, por ky numër mund të jetë edhe më i lartë për shkak se disa janë përfitues të asistencës sociale, dhe i kanë shmangur kontrata për të mos humbur të drejtën e asistencës sociale.

Ymer Haradinaj, anëtar i kuvendit - tha se kur është dhënë në shfrytëzim ky objekt është proklamuar që vitin e parë do të punësohen 60 punëtorë kryesisht gra, ndërsa nëse vazhdohet edhe më tej, ky numër të jetë 100 persona që do të punësohen. Andaj në këtë kontekst është shkelur kontrata. Ky objekt gjendet në oborrin e shkollës së re, në sipërfaqe prej 845 m² dhe i njëjti është dhënë pa pagesë dhe kjo i bie se nuk është arritur qëllimi i investimit. Tutje shtoi se nuk është e vërtetë që janë investuar 170,000.00 € në atë fabrikë, pasi që objekti i ri i shkollës ka kushtuar 300,000.00 € ndërsa në objektin e vjetër ka pasur shumë më pak intervenime. E vërteta është se numri i të punësuarave është shumë më i vogël se ai proklamuar nga ish-kryetari i komunës. Në fund shtoi se duhet të ulemi gjithë së bashku, ta gjejmë një zgjidhje, ashtu që ai objektet të jetë ashtu siç ka qenë objekt edukativo-arsimor, ndërsa investitorit t'i gjendet një zgjidhje tjetër.

Ferit Idrizi, Kryetar i komunës - tha se nuk kemi nevojë të tensionohemi, dhe ta zgjatim debatin aq shumë, dhe përsëriti që me qëllim që të bëhet gjithçka transparente, të formohet një komision prej 5 anëtarëve, 2 nga ekzekutivi dhe 3 nga kuvendi, ashtu që të konstatohet gjendja faktike dhe kjo çështje prapë të vendoset nga ana e kuvendit. Tutje propozoi që pjesë e komisionit nga ekzekutivi të jetë Fortuna Krasniqi, drejtoreshë e urbanizimit dhe Shqiponja Mikushnica, drejtoreshë e inspektimeve. Si zyrtarë komunal vlerësoi se të gjithë bartim përgjegjësi para qytetarëve, por edhe para bizneseve, andaj kërkoi nga anëtarët e kuvendit që kësaj çështjeje mos t'i qasen në mënyrë emocionale.

Në vazhdim, kuvendi me 27 vota “për” vendosi që të themelojë një komision për konstatimin e gjendjes faktike në ish-objektin e shkollës “Migjeni”, tani fabrika e tekstit “Vitex” në fshatin Stanoc i Epërm, si dhe ky komision do të bëjë konstatimin e gjendjes faktike të një objekti që po ndërtohet në fshatin Pestovë:

Nga sa u tha më lart, u vendos:

1. Me këtë vendim formohet komisioni komunal ad-hoc kuvend-qeveri komunale për verifikimin e procesit të dhënies së pronës komunale në shfrytëzim, verifikimin e dokumentacionit, investimet e bëra nga investitori, kontrata e punëtorëve lidhur me projektin, objekti i vjetër i shkollës “Migjeni” në fshatin Stanoc i Epërm që i është dhënë në shfrytëzim kompanisë së tekstit “Vitex” për zhvillimin e veprimtarisë biznesore. Po ashtu komisioni do të bëjë konstatimin e gjendjes faktike të një objekti që po ndërtohet në fshatin Pestovë, që konsiderohet se cenon moralin publik, sipas kundërshtimit të bërë përmes peticionit të banorëve të fshatrave Nedakoc dhe Pestovë, në përbërjen si në vijim:

1.1 Mensur Kosumi, anëtar i kuvendit;

1.2 Ymer Haradinaj, anëtar i kuvendit;

1.3 Faton Hyseni, anëtar i kuvendit;

1.4 Fortuna Krasniqi drejtoreshë e Drejtorisë së Urbanizimit, dhe

1.5 Shqiponjë Mikushnica drejtoreshë e Drejtorisë së Inspektimeve.

2. Obligohet Komisioni i cekur në pikën 1 të këtij vendimi që bëjë verifikimin e proceseve të cekura si më lartë, të bëjë konstatimin e gjendjes faktike në objektet e cekura në dispozitiv të këtij vendimi, dhe pas përfundimit të këtij procesi, konform të gjeturave në terren, duhet të hartojë raport me shkrim dhe të njëjtin duhet të t'ia adresojë Kuvendit të Komunës së Vushtrrisë për vendosje meritore.

3. Për zbatimin e këtij vendimi obligohet komisioni i cekur në pikën 1 të këtij vendimi.

4. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë.

Në vazhdim, kuvendi pas votimit me 29 vota “për”, asnjë “kundër” dhe asnjë “abstenim” vendosi me sa vijon:

1.Me këtë vendim aprovohet lista e veçantë që planifikohet për dhënien në shfrytëzim afatshkurtër të pronës së paluajtshme të Komunës së Vushtrrisë, parcela kadastrale P-70202044-00586-0 me

sipërfaqe prej 25832m², P-70202044-00529-0 me sipërfaqe prej 15761m², P-70202044-01096-0 me sipërfaqe prej 2100m², ZK-Novolan, parcela P-70202053-00366-1 me sipërfaqe prej 25436m², ZK-Prelluzhë, parcela P-70202063-00037-0 me sipërfaqe prej 54774m², ZK-Strovc, parcela P-70202037-00051-0 me sipërfaqe prej 100543m², parcela P-70202037-00337-0 me sipërfaqe prej 55449m², parcela P-70202037-00699-0 me sipërfaqe prej 23272m², ZK-Kollë, parcela P-70202040-00431-0 me sipërfaqe prej 101525m², ZK-Dumnicë e Llugës, parcela P-70202028-00412-1 me sipërfaqe prej 35232m², parcela P-70202028-00412-4 me sipërfaqe prej 6211m², ZK-Stanoc i Poshtëm, parcela P-70202061-0079K-2 me sipërfaqe prej 14126m², ZK-Sllatinë, parcela P-70202062-0K106-1 me sipërfaqe prej 1002m², ZK-Qytezë, parcela P-70202010-00789-0 me sipërfaqe prej 28502m², ZK-Bukosh, parcela P-70202035-00474-0 me sipërfaqe prej 29693m², ZK-Liqen, parcela P-70202035-00482-0 me sipërfaqe prej 39838m², ZK-Liqen, parcela P-70202035-00483-0 me sipërfaqe prej 13638m², ZK-Liqen, pjesë nga parcela kadastrale P-70202011-00435-27, në sipërfaqe prej 2000m², nga sipërfaqja e përgjithshme prej 69457m², ZK Lummadh, ish-objekti i shkollës fillore në fshatin Stanoc i Epërm.

- 1.1 Parcela kadastrale P-70202044-00586-0 me sipërfaqe prej 25832m², P-70202044-00529-0 me sipërfaqe prej 15761m², P-70202044-01096-0 me sipërfaqe prej 2100m², ZK Novolan, jepen në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari bujqësore.
- 1.2 Parcela P-70202053-00366-1 me sipërfaqe prej 25436m², ZK-Prelluzhë, jepet në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari bujqësore.
- 1.3 Parcela P-70202063-00037-0 me sipërfaqe prej 54774m², ZK-Strovc, jepet në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari bujqësore.
- 1.4 Pjesë nga parcela P-70202037-00051-0 me sipërfaqe prej 45000m², nga sipërfaqja e përgjithshme prej 100543m², parcela P-70202037-00337-0 me sipërfaqe prej 55449m², parcela P-70202037-00699-0 me sipërfaqe prej 23272m², ZK-Kollë, jepen në shfrytëzim afatshkurtër për 10 vite përmes konkursit publik-ankandit për persona fizikë dhe juridikë për veprimtari bujqësore.
- 1.5 Parcela P-70202040-00431-0 me sipërfaqe prej 101525m², ZK-Dumnicë e Llugës, jepet në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari bujqësore.
- 1.6 Parcela P-70202028-00412-1 me sipërfaqe prej 35232m², ZK-Stanoc i Poshtëm, jepet në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari bujqësore.
- 1.7 Parcela P-70202028-00412-4 me sipërfaqe prej 6211m², ZK-Stanoc i Poshtëm, jepet në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari afariste.

- 1.8 Parcela P-70202061-0079K-2 me sipërfaqe prej 14126m², ZK-Sllatinë, jepet në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari bujqësore.
- 1.9 Parcela P-70202062-0K106-1 me sipërfaqe prej 1002m², ZK-Qytezë, jepet në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari afariste.
- 1.10 Pjesë nga parcela P-70202010-00789-0 me sipërfaqe prej 20000m² nga sipërfaqja e përgjithshme prej 28502m², ZK-Bukosh, jepen në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari bujqësore.
- 1.11 Parcela P-70202035-00474-0 me sipërfaqe prej 29693m², ZK-Liqen, parcela P-70202035-00482-0 me sipërfaqe prej 39838m², ZK-Liqen, parcela P-70202035-00483-0 me sipërfaqe prej 13638m², ZK-Liqen, jepen në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari bujqësore.
- 1.12 Pjesë e parcelës P-70202011-00435-27 me sipërfaqe prej 2000m², nga sipërfaqja e përgjithshme prej 69457m², ZK-Lummadh, jepen në shfrytëzim afatshkurtër për 10 vite, përmes konkursit publik-ankandit për persona fizikë dhe juridikë për veprimtari afariste.
- 1.13 Ish-objekti i shkollës fillore në fsh. Stanoc i Epërm, në sipërfaqe 845 m², i cili gjendet në rrugën “Galip Maloku” nr.6, nën menaxhimin e Komunës së Vushtrrisë.

2. Obligohet Komisioni për dhënien në shfrytëzim të pronës së paluajtshme të komunës, të zhvillojë procedurat për shpalljen e ankandit publik për pronat nga nënpika 1.1 deri 1.12. Për pronën në nënpikën 1.13 të zhvillohen procedurat e negociimit për dhënie në shfrytëzim. Drejtoria për Gjeodezi, Kadastër dhe Pronë, duhet të bëjë përditësimin dhe mirëmbajtjen e listës, pas përfundimit të procedurave të ankandit dhe menaxhimin e të gjitha kontratave pas lidhjes së tyre.

3. Pjesë përbërëse e këtij vendimi paraprak janë: certifikatat e pronës dhe kopjet e planit.

4. Ky vendim hynë në fuqi pesëmbëdhjetë (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

6. Shqyrtimi i Informatës lidhur me gjendjen dhe mbrojtjen e pyjeve në Komunën e Vushtrrisë

Refik Maloku, anëtarë i kuvendit - tha se pjesa prej 13,000.00 hektarë, pyje të përshkruhen me vetëm një faqe informatë është më të vërtetë shqetësuese. Më tej shtoi se pyjet siç dihet janë mushkëritë e ambientit ku jetojmë, dhe procesi i fotosintezës shndërrohet në pyje, andaj kujdesi që ne po ju kushtojmë është minor. Kjo vërtetohet me faktin se Komuna e Vushtrrisë ka vetëm 6 roje pylli që është shifër e papërfillshme për mbrojtjen dhe ruajtjen e suksesshme të pyjeve. Një qasje e tillë është tepër joserioze dhe tregon se në çfarë gjendje sot i kemi pyjet dhe ruajtjen e mjedisit.

Ergin Sunguri, drejtor i DEBPZHR-së - paraqiti sqarime të përgjithshme lidhur me informatën në fjalë, duke dhënë përgjigje për anëtarët e kuvendit.

Ali Januzi, anëtar i kuvendit - tha se gjendja e ruajtjes së pyjeve është alarmante, dhe pyeti drejtorin gjegjëse se a ka mundësi të shtohet numri i rojtarëve të pyjeve, pasi që ky numër është tepër i vogël për t'i ruajtur me sukses pyjet. Tutje kërkoi nga kryesuesja e kuvendit që të mbajë rend në mbarëvajtjen e mbledhjes, pasi që nuk jemi serioz në diskutime dhe ka lëvizje të tepërta duke hy dhe dal jashtë sallës së kuvendit nga të pranishmit.

Ilmi Azemi, anëtar i kuvendit - tha se drejtorja gjegjëse duhet të hartojë një plan operativ për rajonizimin e pyjeve, sidomos aty ku janë të dendura, për të pasur qasje dhe ndërhyrje të zjarfikësve në rastet e përhapjes së zjarreve në pyje, me qëllim të preventivës së përhapjes së zjarreve dhe mbrojtjes së tyre.

7. Shqyrtimi i Propozim – vendimit për formimin e komisionit për emërtimin dhe caktimin e kufijve të lagjeve urbane të Komunës së Vushtrrisë

Pas shqyrtimit të kësaj pike të rendit të ditës, kuvendi pas votimit me vota “unanime” vendosi me sa vijon:

1. Me këtë vendim formohet komisioni për emërtimin dhe caktimin e kufijve të lagjeve urbane të Komunës së Vushtrrisë në përbërjen si në vijim:

- 1.1 Arlind Gogolli, anëtar i kuvendit (PDK);
- 1.2 Leonora Gërguri, anëtare e kuvendit (LDK);
- 1.3 Fatmire Cecelia anëtare e kuvendit (LVV);
- 1.4 Izet Miftari nga administrata komunale;
- 1.5 Egzon Haradinaj nga administrata komunale.

2. Komisioni i cekur në pikën 1 të këtij vendimi, duhet të takohet brenda afatit prej 7 ditëve, ku në përbërjen e tij duhet të zgjedhë kryesuesin e komisionit dhe procesmbajtësin.

3. Qëllimi i themelimit të këtij komisioni është emërtimi dhe caktimi i kufijve të lagjeve urbane në Komunën e Vushtrrisë.

4. Komisioni ka për detyrë që të paraqesë para Kuvendit të komunës, propozimet për emërtimin dhe caktimin e kufijve të lagjeve urbane të Komunës së Vushtrrisë.

5. Për zbatimin e këtij vendimi obligohet komisioni i cekur në pikën 1 të këtij vendimi.

6. Ky vendim hynë në fuqi shtatë (7) ditë pas publikimit në faqen zyrtare të Komunës së Vushtrrisë.

8. Shqyrtimi i Peticionit të përbashkët i banorëve të sheshit “Adem Jashari” dhe rrugës “Galip Badivuku” për largimin e trafos së rrymës nga sheshi

Adnan Lahu, anëtar i kuvendit - tha se kjo çështje e kësaj trafoje nuk është në kompetencat e komunës, por është në domenin e KEDS-it, dhe kjo paraqet një problematikë në vete për qytetarët

dhe komunën. Më tej ai vlerësoi se Drejtoria e Shërbimeve Publike duhet të analizojë që të gjejë një lokacion të përshtatshëm për vendosjen e kësaj trafoje, dhe këtë t'ia propozojë KEDS-it.

Agron Përçuku, anëtar i kuvendit - tha se shqyrtimi i peticioneve është obligim ligjor, ku adresohen shqetësimet e qytetarëve. Pastaj shtoi se nga mbledhja e KPF-së është kërkuar nga Drejtoria e Urbanizimit që të bëjë një analizë për gjetjen e një lokacioni për vendosjen e kësaj trafoje dhe i njëjti t'i sugjerohet KEDS-it. Ai pyeti se deri ku ka shkuar procesi i heqjes së kabllos nga sheshi i qytetit, për arsye se këto kablllo lidhen me trafon që sot është objekt shqyrtimi.

Bekim Zabërgja, anëtar i kuvendit - vlerësoi se është mirë që trafot që gjenden në qendër të qytetit dhe në sheshe të largohen në vende adekuate, ku mënjanohet rreziku për jetën e qytetarëve. Ai ceku se duhet të gjendet një modalitet ligjor mes komunës dhe KEDS-it, për zgjidhjen e kësaj problematike, duke respektuar konditat ligjore sepse KEDS, është kompani private dhe ne si kuvend nuk mund të marrim vendim për një gjë të tillë.

Ilmi Azemi, anëtar i kuvendit - kërkoi nga qeveria komunale që të rishikojë procedurat nga qeverisja e kaluar, sepse ka indikacione që ka pasur një tender për të cilin janë paguar mjetet financiare nga komuna, dhe se në përshkrim të detyrave ka pasur obligim të kryhen, largimi i kabllove nëntokësore dhe largimi i trafos nga sheshi "Adem Jashari". Lidhur me këtë çështje kërkoi raport me shkrim nga Drejtoria e Prokurimit se deri ku ka shkuar ky aktivitet i prokurimit, pse ka ngecur aktiviteti i largimit të atyre kabllove dhe se a është iniciuar ndonjë procedurë ligjore. Pastaj edhe pse KEDS është kompani private, komuna ka të drejtë të ndër marrë veprime nëse kjo kompani rrezikon qytetarët, duke i dhënë një afat për largimin e atyre kabllove dhe mënjanimin e rrezikut.

Alban Bajrami, anëtar i kuvendit - tha se komuna ka të drejtë t'i adresohet jo vetëm KEDS-it por edhe ZRRE, sepse ata janë autoriteti rregullues dhe licencues të kompanive të energjisë dhe ata mund ta detyrojnë KEDS-in, që në bazë të planit të operatorit të distribucionit të bëhet zhvendosja e asaj trafoje. Andaj propozoi që DSHP-ja menjëherë t'i drejtohet ZRRE-së, sepse komuna nuk ka kompetencë për largimin e trafove, por ka obligim t'i përgjigjet peticionit të qytetarëve.

Në fund të diskutimeve lidhur me këtë pikë të rendit të ditës, kuvendi pas votimit me vota "unanime" vendosi me sa vijon:

Kuvendi i Komunës së Vushtrrisë në mbledhjen e rregullt të mbajtur më datë: **26 maj 2022**, konform obligimeve ligjore që rrjedhin nga Ligji për Vetëqeverisje Lokale, ka shqyrtuar peticionin e banorëve përgjatë sheshit "Adem Jashari" dhe Rr. "Galip Badivuku" të parashtruar në emër z. Faruk Saraçit, që lidhet me kërkesën e tyre për largimin e një trafoje të energjisë elektrike, e cila gjendet në lokacionin përballë postës së qytetit në sheshin "Adem Jashari", andaj Kuvendi i komunës pas një analize të hollësishme, drejtorive të lartcekura iu parashtron këtë:

Kërkesë

Kuvendi i Komunës së Vushtrrisë kërkon nga Drejtoria për Urbanizëm dhe Mbrojtje të Mjedisit dhe Drejtoria për Shërbime Publike, që në bashkëpunim me KEDS-in, ta shqyrtojë dhe analizojë me kujdes kërkesën që rrjedh nga peticioni i cekur më lart, konform legjislacionit në fuqi, si dhe duke marrë për bazë interesin qytetar, të marrë vendim për kërkesën që derivon nga peticioni, ashtu që në koordinim mes tyre të gjejnë një lokacion të ri të përshtatshëm për vendosjen e asaj trafoje.

Drejtoritë e cekura më lart obligohen të bëjnë konstatimin e gjendjes faktike dhe atë të rrezikshmërisë që paraqet stabilimenti në fjalë për banorët e atij lokaliteti, dhe konform të gjeturave në terren t'i propozojnë KEDS-it, dislokimin e asaj trafoje dhe vendosjen e saj në një lokalitet të përshtatshëm.

Obligohen drejtoritë e cekura më lart që të jepin përgjigje me shkrim brenda afatit ligjor dhe për të njëjtën ta njoftojnë Kuvendin e komunës dhe parashtruesin e peticionit.

9. Shqyrtimi i Peticionit të përbashkët të fshatrave Nedakoc dhe Pestovë për kundërshtimin e ndërtimit të një objekti që konsiderohet se cenon moralin publik

Melihate Basholli-Latifi, kryesuese e kuvendit - konstatoi se i njëjti komision i cili është formuar për konstatimin e gjendjes faktike në objektin-shkollë në fshatin Stanoc i Epërm, fabrika <Vitex>, po ashtu i njëjti do të ketë mandat të vlerësojë dhe konstatojë gjendjen faktike të objektit në fshatin Pestovë, sipas peticionit të banorëve të atij lokaliteti që konsiderojnë se ai objekt cenon moralin publik.

Kuvendi me vota “unanime” konstatoi se komisioni ad-hoc kuvend-qeveri komunale do të merret me konstatimin dhe verifikimin e gjendjes faktike në objektin në fshatin Pestovë që është objekt kundërshtimi me peticionin e banorëve.

Kuvendi i Komunës së Vushtrrisë në mbledhjen e rregullt të mbajtur më datë: **26 maj 2022**, konform obligimeve ligjore që rrjedhin nga Ligji për Vetëqeverisje Lokale, ka shqyrtuar peticionin e banorëve të fshatrave Nedakoc dhe Pestovë të parashtruar në emër **z. Avdullah Zhegrova**, që lidhet me kërkesën e tyre për kundërshtimin e ndërtimit të një objekti që konsiderohet se cenon moralin publik.

Andaj lidhur me këtë çështje ju njoftojmë se Kuvendi i Komunës së Vushtrrisë ka themeluar një komision i cili do të merret me gjetjen e një zgjidhjeje lidhur me këtë problematikë.

Mbledhja përfundoi në ora: 16:10.

Bastri Duraku



Procesmbajtës

Melihate Basholli-Latifi



Kryesuese e Kuvendit

